

Doenghbaez, youq aen mbanj he miz boux vunz he heuhguh Mijciz, ranz de mbouj miz maz ngaenz. De daengz 40 geij bi ngamq aeu ndaej bawx.

Yah de gig gik, baenzngoenz cij rox gwn caeuq youz ndwi, gaiq wng gijmaz saeh cungj mbouj guh. Ndigah hongranz cungj dwg Mijciz bae guh. Mijciz moix ngoenz caeuxcaeux couh aeu hwnq, cawj doxgaiq gwn, daengz yah de hwnqdaeu, gwnz daiz gaenq baij hwnj haeux caeuq byaek lo. Danghnaeuz saek ngoenz mbouj miz huq ndei gwn, couh sikhaek ndaq Mijciz lumj duzma duzmou nei.

Moix baez Mijciz coenz vah ndeu hix mbouj gangj, laeglemx okbae, coh ndaw ndoeng byaij bae. Mbouj gvaq geij nanz, de couh daj ndaw ndoeng gwed dauq haujlai nohnyaen, lumj-baenz nohroegraeu, nohngwz, noh-duzlinh daengjdaengj. Caezgya cungj roxnyinh geizheih dangqmaz, dauq-daej Mijciz daj gyawz gaemh ndaej baenzneix lai nohnyaen dauq ne? Miz vunz bae cam, de cijdwg riu mbouj gangj maz, nanz liux caezgya cungj rox cam de hix cam mbouj ok maz, couh mbouj cam lo.

Gaxgonq Mijciz baez gwed nohnyaen dauq ranz, yah de angqvauvau. Hoeng, gvaq mbouj ndaej geij nanz, de gwnz nywnx nohnyaen youh hainduj ndaq Mijciz naeuh, mbouj ndaej hawj de gwn ndei daenj ndei. Mijciz hix mbouj ok sing, youh



laeglemx byaij ok rog bae. Daengz gyanghaemh de gawqyienz youh dawz dauq haujlai nohnyaen caemh-caiq lij miz geij geu buh lengj dem, yah de riu ndaej aenbak cungj haep mbouj hwnj. Nanz liux yah de couh ngeiz Mijciz baenzlawz ra ndaej baenzlai doxgaiq dauq. De cam Mijciz geij baez, hoeng Mijciz cungj mbouj gangj, baenzneix de couh menhmenh haeujsim Mijciz bae gyawz lo.

Youq haemh doek fwn he, Mijciz dauq ranz haemq haemh, dawz dauq haujlai nohmou, nohcwz. Seizhaenx yah de gaenq iek ndaej dingj mbouj ndaej lo, coi Mijciz vaiq di cawj noh hawj de gwn. Hoeng, cingqngamj seizneix ndaw ranz mbouj miz saek geu fwnz, yah de couh ndaq de. Mijciz

naeuz: “Mbouj yungh gip, gou miz banhfap dauq cawj doxgaiq. Hoeng, cijdwg mwngz aeu ok rog yaep ndeu, caj gou guh baenz heuh mwngz dauq dauq mwngz caiq dauq, gou mbouj heuh couh mbouj ndaej haeu ranz, engqgya mbouj ndaej haeu bakcauq.” Yah de dingq Mijciz baenzneix gangj, buenq saenq buenq ngeiz hoeng vanzlij byaij ok rog bae. Yah de baez byaij ok, Mijciz couh gaenjgip gven bakdou ranz hwnjdaeu, haeu bakcauq, caiq gven dou bakcauq hwnjdaeu.

Yah de gig geizheih, de byaij ok dauq liux yied siengj yied roxnyinh gienh saeh neix mbouj deng. Youq baihrog ranz cienq gien ndeu, couh laeglemx haeu ndaw ranz bae. Ndaw

ranz mbouj diemj daeng, laepsaeng-saeng, hoeng nyouq ndaej feih noh hom. Ndaw bakcauq miz geu rongh yienh ok, de siengj yawj baihndaw miz maz saeh couh hai dou bakcauq, coh ndaw byaij bae. Baez haeu ndaw, de couh swenj hwnjdaeu lo.

Yenzlaiz de yawjraen ciengzgingj hawj de gig lau, Mijciz cingq guh mo, aeu fwngz bonjfaenh guh fwnz, cuengq haeu ndaw cauq, feiz coemh fwngz de hwnjfwdfwd. Sing swenj de ging-doengh liux Mijciz, Mijciz siengj ndaep feiz bae, hoeng feiz gaenq mbouj dingq de mo lo, laebdaeb youq gwnz fwngz de coemh, lij coemh daengz gwnz ndang de bae. Mbouj geij nanz Mijciz couh bienqbaenz gyoengz feiz he lo. De doq cak doq cwnj, ndaq yah de baenzlawz mbouj dingq de gangj, de guh mo daengz dingz couh dauq. Yah de deng ciengzgingj neix hwk daengz lo, gvaq yaep ndeu cij fanjying doxdauq, de hwnjbae siengj bang Mijciz ndaep feiz, hoeng gij feiz mbouj rox vihmaz cungj dwg ndaep mbouj bae, doeklaeng Mijciz couh deng coemh dai lo.

Itcig daengz haemhhaenx, gyoengqvunz cij rox Mijciz vihmaz cungj ndaej dawz haujlai doxgaiq dauq ranz, yenzlaiz de rox guh mo, sojmiz doxgaiq cungj dwg de guh mo bienqbaenz, gangjdaengz de bae gyawz hag ndaej guh mo couh mbouj miz vunz rox lo.

Aeueiq Bouxlaux

尊 老 敬 老

□ Boh Dahging / 波达荆

Youq lajmbanj, mbanjmbanj cungj raen miz doenghboux gyaeu ndaej bet goujcib bi haenx. Gyoengqde lanlaenj baenz gyoengq, youq ranz yieingfuk, vuenyungz gvaq bigeq.

Ngoenznaengz, doenghboux goeng laux yah geq neix cungj miz vunzranz buenx de, mbouj dwg lwgsai lwgmbwk couhdwg lanmbauq lansau, bang de aeu ngaiz aeu raemx, daengh de gangjgoj guhcaemz, byaij ok rog bae cetyouz.

Geij bi neix dou ciengzseiz deng roengz Mbanjgorenha bae guhhong, baezbaez roengzbae cungj roeb boux daxau ndeu gaex aen eijloek ndeu, naihlau geq ndeu naengh youq gwnz eijloek, nanz mbouj nanz lij raen daxau haenx gaemz gyaeu roengzbae gyawj naihlau haenx, youq gokrwz de gangjsebseb, gwnz naj naihlau gaenq cib nyaeuq bet nyaeuq, seiz mbouj seiz cix loh ok riunyumj. Naihlau neix couhdwg bouxlaux ceiq geq Mbanjgorenha, de gaenq gyaeu ndaej bak bi lo, coh heuhguh Veiz Yicangz, boux daxau gaex eijloek haenx couhdwg daeglwg byai de Banh Gicaiz, dwg boux lauxsae duiyouh ndeu.

Naihlau neix miz 3 daeglwg, linghvaih 2 boux dwg guhnaz, hong nyaengq lailai, mbouj miz geijlai

seizgan buenx mehlaux, gijneix Banh Gicaiz cungj rox, cungj yawj ndaej hai. Naihlau nyuenz gag youq fungh ranz gaeuq ndeu, vih liux haethaemh ndaej engq ndei bae hauqswnh caeuq ciuqgoq bouxgeq, Banh Gicaiz hixnaengz ciep naihlau dauq aen ranzmoq de caez youq. Miz vunz cam, de dap naeuz: “2 boux daeggo bi daengz byai hong cungj nyaengqny’nyi, ngoenznaengz cawz le soengq ndaej saek di haeux caeuq byaek gvaqdaeu le, couh mbouj miz maz seizgan dauq buenx mehlaux lo. Mehlaux nienzeigj geq lo, cix mbouj ndaej hawj de gudan gag youq ha, couh hawj de nem gou guhdoi youq. Fanjingq gou gaenq duiyouh lo, mbouj miz maz hong guh, couh lai buenx mehlaux saek di ba.”

Banh Gicaiz gag lwnh naeuz, de ngoenzngoenz cungj dwg fifi fwdfwd guhgak gij hongranz bonjfaenh le, couh bae henz ndang naihlau buenx de. Daek ngaiz caem caz hawj de, daek raemx hawj de swiq naj, bang de rieg buhvaq uq, lij gingciengz bang de fou gyaeu, roi byoem, raed ribfwngz, roq baihlaeng, naenx ga. Dingzlai seizgan dwg buenx de gangjgoj, ngonz densi. Mwh ngonz densi, aenvih naihlau dingq mbouj roxyiuj Vahgun, Banh Gicaiz lij ciengzseiz bak nam-byoegbyoeg gejgangj hawj naihlau



Louzsiuhauz Gveilnz.

nyi. Cawj ngaiz cawj byaek gaxgonq, Banh Gicaiz cungj dwg cam naihlau gonq, cam de siengj gwn gijmaz, ciepdwk couh ciuq naihlau gangj bae cawj, cinjseiz cawj ndaej byaek feih ngaiz hom dawz dauq daengz dangqnaiz naihlau, caenhliengh hawj nauhlau sim’angq, rimhoz. Ban Gicaiz couhdwg yienghneix baenz le bouxhoiq cienmonz fugsah naihlau ndeu.

Ranz Banh Gicaiz liz Hawnaz-heuj ngamq miz saek goengleix gyae, mwh mbwn ndei mbouj hwnq mbouj nit, Banh Gicaiz haengj yungh eijloek gaex naihlau youq ndaw mbanj cet saek geij gien, roxnaeuz bae gwnzhaw cet yaep ndeu, bae doenghnaz henz

mbanj mupmup gij hoengheiq singisien. Moix daengz mwhde, naihlau cungj haengjheiq raixcaix.

Roengzmbanj dauqma le, gou gag guh liux 2 hot fwen, raiz ndei le baij youq najdaiz gou, mbouj rox baij geilai nanz lo, gou cungj mbouj sij ndaej beuj deuz. Hot fwen haenx dwg yienghneix:

Vunzmbanj lumj go’ndoeck,
Laj goek maj rim rangz;
Miz bouxlaux henz ndang,
Lwglan angq bae hauq.

Miz laux cij miz coz,
Ndawhoz aeu geiq maenh,
Loekrumz riengz rumz baenq,
Bouxboux haenh naeuz ndei.